

Թէ ինչ կը լինէր հետեանքը այս տնաքանդ փախուստի, դժար է ասել, եթէ մէջտեղ չգար արտաքին միջամտութիւն. մայիս 24-ից Թերեզի ժողովրդական կառավարութիւնը փակեց դաղթականների առջև Հիւսիսային Կովկասի ճանապարհը, որով հոսանքը կանգ առաւ, և դաղթել ցանկացողների մեծ մասը մնաց Անդրկովկասում: Թիւրքական եաթաղանից ազատւածները, Հիւս. Կովկասում, ընկան բոլշեւիկեան դժոխքը. այնտեղ նրանց սպասում էին նոր զրկանքներ, նոր տառապանքներ ու նոր հիասթափութիւններ: